

Kalau apa yang saya cakap salah, buktikan - Dr Mahathir
Astro Awani
08 Jun 2023

KUALA LUMPUR: Tun Dr Mahathir Mohamad menjelaskan beliau bersedia didakwa atas kenyataannya berkaitan sejarah Kedah dan Proklamasi Orang Melayu.

Bekas perdana menteri itu berkata undang-undang tidak pernah menghalang sesiapa sahaja untuk bercakap tentang sejarah, melainkan ia membabitkan cerita palsu atau fakta tidak benar.

"Demokrasi memperuntukkan penggulingan Kerajaan melalui pilihan raya atau melalui undi tidak percaya.

"Mengenai sejarah, undang-undang tidak melarangnya. Hanya jika kita mempromosikan cerita palsu untuk tujuan yang salah.

"Tetapi bercakap benar tentang masa lalu bukanlah satu jenayah. Seperti kata George Santayana, mereka yang melupakan sejarah akan mengulangi kesilapan sama berulang kali," katanya dalam satu kemas kini di Twitter.

Tambahnya, jika benar kenyataannya itu salah, ia harus dibuktikan dan menyifatkan tindakan menghantar polis untuk menyoal siasatnya adalah satu bentuk ugutan.

Pada 2 Jun lalu, Dr Mahathir disoal siasat oleh polis di bawah Seksyen 124B Kanun Keseksaan atas dakwaan melakukan aktiviti yang memudaratkan demokrasi berparlimen.

© 2023 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/kalau-apa-yang-saya-cakap-salah-buktikan-dr-mahathir-423126>